

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI ISNIN, 27 OKTOBER 2014, PUKUL 10.00 PAGI

Bil. 37

PERTANYAAN-PERTANYAAN BAGI JAWAB LISAN

1. PR-1323-L63671
Tuan Che Mohamad Zulkifly bin Jusoh [Setiu] minta **MENTERI KESIHATAN** menyatakan mengapakah caj perubatan di klinik-klinik dan hospital swasta yang dikenakan kepada pesakit yang menggunakan kad insurans adalah lebih tinggi berbanding pembayaran kos perubatan yang dilakukan secara tunai.
2. PR-1323-L64433
Tuan Charles Anthony Santiago [Klang] minta **MENTERI SUMBER ASLI DAN ALAM SEKITAR** menyatakan langkah-langkah Kementerian untuk mengatasi kemelut jerebu akibat pembakaran terbuka di Johan Setia, Klang. Bolehkah Kementerian mempertimbangkan meningkatkan kadar kompaun daripada RM2,000 kepada RM75,000 sebagai '*deterrent*' yang serius.
3. PR-1323-L63447
Datuk Dr. Haji Abd. Latiff bin Haji Ahmad [Mersing] minta **MENTERI KOMUNIKASI DAN MULTIMEDIA** menyatakan terdapat banyak pencawang telekomunikasi yang dipasang di merata tempat oleh syarikat telekomunikasi termasuk di sekolah. Adakah Kementerian membuat pemantauan berkala untuk mengukur tahap radiasi yang dipancarkan oleh pencawang ini.
4. PR-1323-L63883
Tuan Haji Nasrudin bin Hassan [Temerloh] minta **MENTERI PENDIDIKAN** menyatakan usaha-usaha yang dibuat bagi mempromosikan Pendidikan Teknikal Dan Latihan Vokasional (TEVT) sebagai pilihan utama pelajar memandangkan bidang itu dikatakan mempunyai prospek kebolehpasaran yang tinggi selepas menamatkan pengajian.
5. PR-1323-L64430
Tuan Haji Zainudin bin Ismail [Jelebu] minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan langkah-langkah dan tahap persiapan bagi menghadapi kemungkinan kenaikan harga barangan akibat unsur manipulasi harga ekoran perlaksanaan GST tahun hadapan.

6. PR-1323-L64796
Tuan Ahmad Marzuk bin Shaary [Bachok] minta **MENTERI PERUSAHAAN PERLADANGAN DAN KOMODITI** menyatakan berapakah purata pendapatan yang diperoleh oleh petani dalam Parlimen Bachok daripada hasil tanaman kenaf berbanding tembakau yang pernah memacu ekonomi petani Bachok.
7. PR-1323-L64362
Datuk Ahmad Jazlan bin Yaakub [Machang] minta **MENTERI PEMBANGUNAN WANITA, KELUARGA DAN MASYARAKAT** menyatakan :-
 - (a) berapakah jumlah kes-kes tertangguh yang masih belum diproses oleh Kementerian dalam usaha untuk membantu masyarakat setempat; dan
 - (b) tempoh jangka masa prosedur terbabit dalam mengetahui status penerimaan mahupun penolakan borang permohonan yang telah dihantar oleh pemohon bagi tujuan mendapatkan bantuan bulanan.
8. PR-1323-L63894
Tuan Hee Loy Sian [Petaling Jaya Selatan] minta **MENTERI SUMBER ASLI DAN ALAM SEKITAR** menyatakan kekangan yang dihadapi dalam program Satu Negeri Satu Sungai yang gagal untuk memulihara dan mengembalikan kesemua 59 sungai yang tersenarai dalam kategori tercemar serta kawasan sekitarnya kepada keadaan asalnya.
9. PR-1323-L64140
Datuk Koh Nai Kwong [Alor Gajah] minta **PERDANA MENTERI** menyatakan hala tuju dan pencapaian Talent Corp serta bagaimanakah Talent Corp memastikan rakyat Malaysia balik berkhidmat akan tinggal terus di Malaysia dan pemindahan pengetahuan dan kemahiran.
10. PR-1323-L64039
Dr. Ko Chung Sen [Kampar] minta **MENTERI DALAM NEGERI** menyatakan :-
 - (a) bilangan rakyat Malaysia yang terlibat dalam kegiatan militan di luar negara terutamanya dalam kumpulan pejuang Islamic State; dan
 - (b) apakah pandangan Kerajaan dan tindakan yang akan diambil terhadap golongan ini.
11. PR-1323-L63847
Datuk William @ Nyallau anak Badak [Lubok Antu] minta **MENTERI KEMAJUAN LUAR BANDAR DAN WILAYAH** menyatakan setakat mana tindakan diambil oleh Kementerian ke atas kontraktor yang telah gagal menyiapkan projek bekalan elektrik luar bandar yang begitu lama tertangguh dan menyebabkan rakyat tidak berpuas hati terhadap Kerajaan.

12. PR-1323-L64204
Dr. Michael Jeyakumar Devaraj [Sungai Siput] minta **MENTERI DALAM NEGERI** menyatakan jumlah pekerja asing yang telah diluluskan Pas Khas dalam tiap tahun 2010, 2011, 2012 dan 2013 untuk membolehkan mereka memfailkan kes terhadap majikan mereka di Mahkamah Buruh ataupun Mahkamah Perhubungan Perusahaan.
13. PR-1323-L63506
Tuan Khoo Soo Seang [Tebrau] minta **MENTERI PEMBANGUNAN WANITA, KELUARGA DAN MASYARAKAT** menyatakan usaha Kementerian dari segi memperkenalkan peluang kerja-kerja sambilan di rumah serta memberi latihan yang diperlukan kepada individu-individu yang tidak dapat bekerja di luar kerana perlu menjaga orang-orang sakit kronik atau orang-orang kurang upaya di rumah.
14. PR-1323-L64641
Tuan Wong Ling Biu [Sarikei] minta **MENTERI PENDIDIKAN** menyatakan berapakah jumlah peruntukan pembangunan yang telah diberikan kepada sekolah-sekolah rendah beraliran Bahasa Cina dan Sekolah-sekolah Menengah Jenis Bantuan di bahagian Sarikei dalam 5 tahun yang lepas. Kenapakah Kerajaan Pusat masih meminggirkan sekolah-sekolah rendah beraliran Cina dari segi peruntukan pembangunan sekolah.
15. PR-1323-L63309
Dato' Wira Othman bin Abdul [Pendang] minta **PERDANA MENTERI** menyatakan apakah kejayaan yang telah dicapai oleh jawatankuasa teknikal bersama Kerajaan Pusat dan Kerajaan Kelantan mengenai pelaksanaan hudud. Apakah halangan-halangnya.
16. PR-1323-L64107
Dr. Ong Kian Ming [Serdang] minta **MENTERI SUMBER ASLI DAN ALAM SEKITAR** menyatakan apakah yang telah dan sedang dilakukan oleh Malaysia, dalam konteks ASEAN, untuk memberi tekanan kepada Indonesia untuk meratifikasi "*ASEAN Agreement on Transboundary Haze Pollution*".
17. PR-1323-L65120
Datuk Haji Shabudin bin Yahaya [Tasek Gelugor] minta **MENTERI KEWANGAN** menyatakan bentuk tindakan dan penguatkuasaan bagi membanteras penyeludupan barangan bercukai dan juga barangan haram seperti senjata dan bahan letupan serta mercun.
18. PR-1323-L64335
Dr. Haji Izani bin Haji Husin [Pengkalan Chepa] minta **MENTERI KEMAJUAN LUAR BANDAR DAN WILAYAH** menyatakan jalan-jalan kampung yang akan dinaiktarafkan bagi tahun 2014 dan 2015 di Parlimen Pengkalan Chepa.

19. PR-1323-L63289
Dato' Seri Ong Ka Chuan [Tanjong Malim] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan apakah perancangan yang akan dilaksanakan oleh Kerajaan bagi membantu golongan muda untuk memiliki rumah mereka sendiri, terutamanya di kawasan bandar memandangkan harga rumah di kawasan bandar adalah amat tinggi.
20. PR-1323-L64608
Tan Sri Dato' Seri Abd Khalid bin Ibrahim [Bandar Tun Razak] minta **MENTERI BELIA DAN SUKAN** menyatakan apakah strategi untuk mempertingkatkan mutu dan prestasi sukan negara setelah gagal mencapai sasaran pingat di Sukan Komanwel 2014 di Glasgow dan ketinggalan di belakang Singapura dari segi pungutan pingat buat julung-julung kalinya dalam sejarah.
21. PR-1323-L63443
Datuk Dr. Haji Abd. Latiff bin Haji Ahmad [Mersing] minta **MENTERI PEMBANGUNAN WANITA, KELUARGA DAN MASYARAKAT** menyatakan adakah Kementerian bercadang untuk menambahkan bantuan kewangan kepada penerima bantuan kebajikan memandangkan Kerajaan akan melaksanakan GST pada tahun 2015. Jika tiada, apakah usaha Kementerian untuk membantu mereka.
22. PR-1323-L64828
Tuan Shamsul Iskandar bin Mohd Akin [Bukit Katil] minta **MENTERI PENGANGKUTAN** menyatakan status berkenaan mendapan yang kerap berlaku di KLIA 2 dan tahap keselamatan di KLIA 2 susulan penutupan 9 tempat letak kapal terbang disebabkan oleh kebocoran saluran bahan api baru-baru ini.
23. PR-1323-L63925
Datuk Raime bin Unggi [Tenom] minta **MENTERI KOMUNIKASI DAN MULTIMEDIA** menyatakan pencapaian "*hits*" yang menonton siaran langsung sidang perbahasan Parlimen Malaysia menerusi laman web RTM iaitu *rtmparlimen.rtm.gov.my* yang diperkenalkan pada tahun 2013 lalu dan sejauh manakah tontonan ramai bagi rancangan siaran langsung sidang perbahasan menerusi saluran TV1 bagi tahun 2010, 2011, 2012, 2013 dan sepuluh bulan pertama 2014.
24. PR-1323-L64688
Tuan Wan Hasan bin Mohd Ramli [Dungun] minta **MENTERI KERJA RAYA** menyatakan apakah tindakan penyelesaian kemendapan tanah sambungan kepada jalan dengan kepala jambatan seperti di laluan 145 Seksyen 1, Km 3 Jambatan Sungai Ruang dan Km 4 Jambatan Sungai Teluk Kalung Jalan Chukai - Dungun.
25. PR-1323-L63494
Datuk Nur Jazlan bin Mohamed [Pulai] minta **MENTERI KERJA RAYA** menyatakan status serta fungsi Lebuhraya Penyuraian Timur (EDL) di Johor Bahru, sama ada ia akan dikenakan tol atau dikecualikan tol selepas kadar tol Tambak Johor dinaikkan baru-baru ini serta apakah rasional kenaikan kadar tol Tambak Johor.

26. PR-1323-L64008
Tuan Jeff Ooi Chuan Aun [Jelutong] minta **MENTERI KOMUNIKASI DAN MULTIMEDIA** menyatakan apa telah terjadi kepada pemberian “*grant*” sebanyak RM5 juta kepada Konsortium Rangkaian Serantau Sdn Bhd yang terdiri daripada 24 pelesen SKMM. Dengan berdasarkan Laporan dan Penyata Kewangan 2014 syarikat tersebut, adakah pemberian “*grant*” RM5 juta itu telah menepati objektifnya.
27. PR-1323-L65299
Dato' Ir. Haji Nawawi bin Ahmad [Langkawi] minta **MENTERI DALAM NEGERI** menyatakan apakah Kerajaan bercadang untuk mewujudkan sistem “*visa on arrival*” agar memudahkan pelancong asing berkunjung ke negara kita terutamanya pelancong yang bercadang melancong ke Pulau Langkawi.
28. PR-1323-L64586
Tuan Wong Chen [Kelana Jaya] minta **MENTERI PERDAGANGAN ANTARABANGSA DAN INDUSTRI** menyatakan bilangan penasihat layak (*cleared advisors*) yang telah dilantik sehingga kini untuk membantu dan memudahkan perundingan Perkongsian Trans Pasifik (TPPA) dan adakah terdapat GLCs atau GLICs yang telah menghantar penasihat untuk membantu.
29. PR-1323-L64533
Tuan V. Sivakumar [Batu Gajah] minta **MENTERI PERDAGANGAN ANTARABANGSA DAN INDUSTRI** menyatakan secara terperinci mengenai Dana Usahawan Muda di bawah SME Bank yang dilancarkan pada bulan Februari 2013. Setakat ini berapakah jumlah yang dipinjamkan kepada usahawan belia berdasarkan kaum dari tarikh dana itu dilancarkan sehingga kini.
30. PR-1323-L63626
Tuan Tan Kok Wai [Cheras] minta **MENTERI KESIHATAN** menyatakan bilangan pesakit dari negeri-negeri lain yang dirujuk ke Hospital Kuala Lumpur dan Hospital Kerajaan lain di Lembah Kelang dari tahun 2012 hingga September 2014 kerana kekurangan pakar perubatan di negeri-negeri berkenaan. Pakar perubatan jenis apakah yang sangat berkurangan di hospital negeri tersebut dan apakah yang dilakukan untuk mengatasi kekurangan tersebut.
31. PR-1323-L64732
Tuan Teo Kok Seong [Rasah] minta **MENTERI PENGANGKUTAN** menyatakan kos pengambilalihan sistem penguat kuasa elektronik AES serta jumlah kutipan saman yang telah diterima sejak sistem AES dilaksanakan sehingga sekarang.
32. PR-1323-L64442
Tuan Charles Anthony Santiago [Klang] minta **PERDANA MENTERI** menyatakan dasar Kerajaan untuk kurangkan kadar ketidaksamaan pendapatan (*income inequality*) yang sedang meningkat. Adakah fenomena “*inequality*” akan menjadi lebih buruk dengan pelaksanaan GST.

33. PR-1323-L63741
Dato' Haji Mohd Zaim bin Abu Hasan [Parit] minta **PERDANA MENTERI** menyatakan adakah perlu Akta Hasutan 1948 dihapuskan dan digantikan dengan Akta Harmoni.
34. PR-1323-L64046
Dr. Ko Chung Sen [Kampar] minta **MENTERI KEWANGAN** menyatakan :-
- (a) berapakah kos untuk membeli kereta Proton Perdana edisi khas baru untuk Perdana Menteri dan Timbalan Perdana Menteri; dan
 - (b) berapakah kos penyelenggaraan kesemua kereta Proton Perdana milik Kerajaan setiap tahun.
35. PR-1323-L64411
Tuan Ignatius Dorell Leiking [Penampang] minta **MENTERI PEMBANGUNAN WANITA, KELUARGA DAN MASYARAKAT** menyatakan langkah dan bantuan yang telah dan akan dijalankan ke atas isu kanak-kanak tanpa kewarganegaraan di Semenanjung serta Sabah dan Sarawak berdasarkan perincian Kementerian Dalam Negeri bahawa jumlah kanak-kanak tersebut mencecah Empat Belas (14,000) ribu dari tahun 2013 sehingga April 2014.
36. PR-1323-L64667
Tuan Mohamed Azmin bin Ali [Gombak] minta **MENTERI KEWANGAN** menyatakan apakah Kerajaan telah mengadakan penilaian kompetensi terhadap daya saing Malaysia Airlines System (MAS) dalam pasaran penerbangan tambang murah sebelum melaksanakan Pelan Pemulihan Baru MAS.
37. PR-1323-L65350
Tan Sri Dato Sri William Mawan Ikom [Saratok] minta **MENTERI KEMAJUAN LUAR BANDAR DAN WILAYAH** menyatakan apakah pelan atau perancangan kontingensi Kementerian menjamin penduduk luar bandar mendapat bekalan air bersih berterusan yang diperlukan penduduk khususnya pada masa musim kemarau yang panjang memandangkan Parlimen Saratok antara kawasan terdedah kepada masalah ketiadaan bekalan air bersih yang berlarutan.
38. PR-1323-L64443
Tuan Charles Anthony Santiago [Klang] minta **MENTERI PERDAGANGAN ANTARABANGSA DAN INDUSTRI** menyatakan kesediaan Kerajaan untuk menghadapi "*ASEAN Economic Community*" (AEC) pada tahun 2015. Dan bagaimanakah Kerajaan akan "*integrate*" '*ASEAN Declaration on Strengthening Social Protection*' di Malaysia.

39. PR-1323-L64763
Puan Kasthuriraani a/p Patto [Batu Kawan] minta **PERDANA MENTERI** menyatakan adakah kerajaan berhasrat untuk meminda Perkara 145(3) Perlembagaan Persekutuan supaya budi bicara Peguam Negara dalam hal ehwal berkaitan dengan permulaan, perjalanan dan pemberhentian prosiding jenayah adalah boleh disemak oleh Hakim Mahkamah Tinggi melalui prosedur semakan kehakiman.
40. PR-1323-L65202
Datuk Seri Panglima Haji Abdul Ghapur bin Haji Salleh [Kalabakan] minta **MENTERI KEWANGAN** menyatakan :-
- (a) apakah Kementerian sedar bahawa penjualan rokok haram tanpa cukai sedang dijual secara terbuka dan berleluasa hampir di seluruh bandar di Sabah; dan
 - (b) berapakah anggaran kerugian negara satu tahun akibat jualan rokok dan bahan tembakau tanpa cukai ini.
41. PR-1323-L64320
Tuan Haji Khalid bin Abdul Samad [Shah Alam] minta **MENTERI PERDAGANGAN ANTARABANGSA DAN INDUSTRI** menyatakan bilakah harga kereta akan mula diturunkan seperti yang dijanjikan semasa Pilihan Raya Ke-13.
42. PR-1323-L63598
Dato' Kamarul Baharin bin Abbas [Telok Kemang] minta **MENTERI PENDIDIKAN** menyatakan :-
- (a) berapakah kos tanggungan makanan bagi seorang pelajar sekolah berasrama penuh (SBP) sehari; dan
 - (b) apakah benar tanggungan makanan harian pelajar kurang daripada tanggungan makanan banduan.
43. PR-1323-L63304
Puan Siti Zailah binti Mohd Yusoff [Rantau Panjang] minta **MENTERI SUMBER MANUSIA** menyatakan rasionalnya Kerajaan bercadang untuk membawa masuk 1.4 juta orang Bangladesh dan akan diberi kad pengenalan khas. Apakah kesan jika keselamatan negara dikuasai oleh bangsa asing.
44. PR-1323-L64866
Dato' Dr. Mujahid Yusof Rawa [Parit Buntar] minta **PERDANA MENTERI** menyatakan perkembangan terkini Institut Islam Hadhari. Apakah fungsinya kini kepada kemajuan serta perkembangan agama Islam dalam negara.
45. PR-1323-L63412
Tuan Wong Sze Phin @ Jimmy [Kota Kinabalu] minta **PERDANA MENTERI** menyatakan adakah Kerajaan bercadang untuk membina LRT, MRT atau Monorel di kawasan bandar raya Kota Kinabalu memandangkan populasi di Kota Kinabalu semakin meningkat dan masalah kesesakan jalan raya yang semakin serius.

46. PR-1323-L63774
Dato' Takiyuddin bin Hassan [Kota Bharu] minta **MENTERI KEWANGAN** menyatakan apakah jaminan Kerajaan agar pekerja-pekerja MAS yang akan dibuang kerja ekoran penstrukturan semula MAS tidak menghadapi tekanan ekonomi dan menambahkan pengangguran.
47. PR-1323-L64371
Tuan Lim Kit Siang [Gelang Patah] minta **MENTERI KOMUNIKASI DAN MULTIMEDIA** menyatakan langkah-langkah yang telah diambil untuk memastikan kelajuan dan kos *broadband* di Malaysia setanding dan bukannya lebih lambat dan mahal berbanding dengan negara-negara lain seperti negara Thailand, Vietnam, Singapura dan Korea Selatan.
48. PR-1323-L63979
Tuan Lim Guan Eng [Bagan] minta **PERDANA MENTERI** menyatakan jumlah peruntukan yang disalurkan kepada 14 kampung baru ataupun new village di Pulau Pinang sejak 2001 hingga 2014. Berikan juga pecahan jumlah peruntukan kepada kampung-kampung baru negeri-negeri lain yang turut tersenarai dalam pelan induk terbabit. Sekiranya terdapat perbezaan jumlah, jelaskan kenapa.
49. PR-1323-L65173
Tuan Ahmad Baihaki bin Atiqullah [Kubang Kerian] minta **MENTERI PENDIDIKAN** menyatakan kejadian soalan bocor pada kertas peperiksaan utama di Malaysia kerap kali kedengaran. Terkini ialah apa yang berlaku kepada kertas mata pelajaran Sains, Bahasa Inggeris 1 & 2 untuk peperiksaan UPSR. Pada pandangan Kementerian, di manakah sebenarnya kelompangan pada sistem penyediaan dan pengagihan soalan sehingga ia boleh diambil kesempatan oleh pihak yang tidak bertanggungjawab untuk membocorkannya dan apakah mekanisme yang dibentuk bagi menjamin perkara sama tidak akan berulang.
50. PR-1323-L64292
Dato' Abd. Aziz bin Haji Sheikh Fadzir [Kulim Bandar Baharu] minta **MENTERI KESIHATAN** menyatakan apakah langkah diambil Kementerian dalam mengatasi masalah infrastruktur di Hospital Kulim terutamanya yang terpaksa menampung peningkatan pesakit sebanyak 5% setiap tahun.
51. PR-1323-L63717
Tuan Fong Kui Lun [Bukit Bintang] minta **MENTERI PENGANGKUTAN** menyatakan apakah faktor yang menyebabkan kehilangan MH370 sukar dikesan hingga kini walaupun usaha pelbagai pihak telah dijalankan semaksimum mungkin.
52. PR-1323-L64312
Puan Teresa Kok Suh Sim [Seputeh] minta **MENTERI PENGANGKUTAN** menyatakan apakah keputusan yang tercapai dalam bengkel (*workshop*) pada bulan Jun berkenaan dengan peraturan kereta cermin gelap. Bilakah Kementerian akan melaksanakan peraturan terbaru ini.

53. PR-1323-L65283
Tuan Tony Pua Kiam Wee [Petaling Jaya Utara] minta **MENTERI KEWANGAN** menyatakan jumlah dan peratus syarikat yang telah mendaftar untuk pelaksanaan GST, kesiap-sediaan sistem IT untuk mengendalikan cukai tersebut dan sama ada tarikh pelaksanaan pada April 2015 lebih wajar ditunda.
54. PR-1323-L64042
Dr. Ko Chung Sen [Kampar] minta **MENTERI PENDIDIKAN** menyatakan :-
- (a) markah lulus bagi kertas Bahasa Inggeris SPM; dan
 - (b) bilangan dan peratusan pelajar yang gagal dalam kertas Bahasa Inggeris SPM ini, dan bilangan pelajar yang telah gagal dalam kertas Bahasa Inggeris SPM tetapi telah diterima masuk universiti awam dan swasta.
55. PR-1323-L64240
Dato' Noraini binti Ahmad [Parit Sulong] minta **MENTERI PERDAGANGAN ANTARABANGSA DAN INDUSTRI** menyatakan langkah-langkah yang diambil oleh Kerajaan untuk memastikan sektor swasta di Malaysia telah bersedia menyahut peluang dan cabaran pewujudan ASEAN Economic Community (AEC) pada tahun 2015.
56. PR-1323-L64967
Tuan Loke Siew Fook [Seremban] minta **MENTERI PELANCONGAN DAN KEBUDAYAAN** menyatakan apakah peranan yang telah dan akan dimainkan oleh "*Malaysia Cruise Council*" dan pendekatan Kementerian untuk memajukan sektor "*cruise tourism*" yang bakal memberikan pulangan yang lumayan kepada industri pelancongan negara.

ATURAN URUSAN MESYUARAT DAN USUL-USUL

1. (D.R.15 /2014) **Rang Undang-undang Perbekalan 2015 – Menyambung semula Perbahasan atas masalah, “Bahawa Rang Undang-undang ini dibacakan kali yang kedua sekarang”
(16 Oktober, 2014)**

DAN

Usul dibuat oleh YAB Menteri Kewangan dan masalah dicadangkan :-

“Bahawa Dewan ini, mengikut subseksyen 4(3) Akta Kumpulan Wang Pembangunan 1966 [Akta 406], membuat ketetapan iaitu suatu jumlah wang sebanyak tidak lebih dari lima puluh bilion empat ratus sembilan puluh sembilan juta sembilan ratus sembilan puluh empat ribu ringgit (RM 50,499,994,000) dibelanjakan daripada Kumpulan Wang Pembangunan bagi tahun 2015, dan bagi tujuan dan butiran perbelanjaan pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2015, yang dibentangkan sebagai Kertas Perintah 42 Tahun 2014, adalah diuntukkan di bawah Maksud-maksud yang berkenaan jumlah-jumlah yang bersementaraan dengan butiran-butiran itu di ruangan enam dan tujuh senarai tersebut.”

Menyambung semula Perbahasan atas masalah (16 Oktober, 2014)

2. (D.R 19/2014) Rang Undang-undang Kewangan (No.2) 2014 **Bacaan Kali Yang Kedua**
[Menteri Kewangan]
3. (D.R 10/2014) Rang Undang-undang Penjara (Pindaan) (No.2) 2014 - **Menyambung semula Perbahasan atas masalah, “Bahawa Rang Undang-undang ini dibacakan kali yang kedua sekarang”
(9 Oktober, 2014)**
[Menteri Dalam Negeri]
4. (D.R 11/2014) Rang Undang-undang Kewangan (Pindaan) 2014 Tatacara **Bacaan Kali Yang Kedua**
[Menteri Kewangan]

5. (D.R 13/2014) Rang Undang-undang Kumpulan Wang Amanah Negara (Pindaan) 2014 “

[Menteri Kewangan]
6. (D.R 12/2014) Rang Undang-undang Wang Tak Dituntut (Pindaan) 2014 “

[Menteri Kewangan]
7. (D.R 14/2014) Rang Undang-undang Kumpulan Wang Pinjaman Perumahan (Pindaan) 2014 “

[Menteri Kewangan]
8. (D.R 16/2014) Rang Undang-undang Suruhanjaya Syarikat Malaysia (Pindaan) 2014 “

[Menteri Perdagangan Dalam Negeri, Koperasi dan Kepenggunaan]
9. (D.R 17/2014) Rang Undang-undang Pendaftaran Perniagaan (Pindaan) 2014 “

[Menteri Perdagangan Dalam Negeri, Koperasi dan Kepenggunaan]
10. (D.R 18/2014) Rang Undang-undang Perkongsian Liabiliti Terhad (Pindaan) 2014 “

[Menteri Perdagangan Dalam Negeri, Koperasi dan Kepenggunaan]
11. **Menteri Kewangan** akan mencadangkan:-

“Bahawa Dewan ini, mengikut peruntukan subperenggan 8(3)(a)(iv) Akta Tatacara Kewangan 1957 [Akta 61], mengambil ketetapan bersetuju supaya Kerajaan Malaysia melalui Menteri Kewangan (Diperbadankan), membuat pelaburan dengan menukarkan pinjaman Kerajaan Malaysia sebanyak RM400 juta kepada Malaysia Debt Ventures Berhad (MDV), sebuah syarikat yang dimiliki oleh Menteri Kewangan (Diperbadankan) kepada ekuiti bersamaan dengan Empat Ratus Juta (400,000,000) unit saham biasa pada nilai RM1 bagi satu unit saham”.

12. **Menteri Kewangan** akan mencadangkan:-

‘Bahawa Dewan ini, mengikut peruntukan di bawah Seksyen 10(4)(a) Akta Tatacara Kewangan 1957, membuat ketetapan bersetuju supaya Jadual Kedua Akta tersebut dipinda dengan menambah kepadanya butiran baru seperti berikut:-

“Kumpulan Wang Amanah Tabung Konservasi Sumber Asli Nasional”

13. **Menteri Kewangan** akan mencadangkan:-

“Bahawa Dewan ini, mengikut peruntukan di bawah Seksyen 10(4)(a) Akta Tatacara Kewangan 1957, membuat ketetapan bersetuju supaya Jadual Kedua Akta tersebut dipinda dengan menambah kepadanya butiran baru seperti berikut:-

“Kumpulan Wang Amanah Fi Jaminan”

14. PR-1323-U63530

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, ketiadaan "Standby Generator" di Klinik Kesihatan Putatan telah menimbulkan banyak kerumitan kepada pengguna dan pengendali Klinik Kesihatan Putatan. Dan mengambil maklum juga, bahawa dengan kekerapan gangguan bekalan elektrik yang dihadapi oleh Negeri Sabah pada ketika ini, ada kalanya klinik tersebut tidak dapat berfungsi sehingga beberapa jam sehari dan dikhuatiri akan mendatangkan kemudaratan dalam kes kecemasan. Dan mengambil maklum juga bahawa, para pengguna Klinik Kesihatan Putatan bukan sahaja yang datang daripada daerah Putatan tetapi juga dari kawasan berdekatan seperti Tanjung Aru, Keapayan, Petagas dan Kinarut. Dan mengambil maklum juga bahawa, selain keadaan gelap gelita dan kelim kabut ketika berlaku gangguan bekalan elektrik, ianya juga membuatkan rakyat mula merungut tentang mutu perkhidmatan kesihatan yang disediakan oleh pihak Kementerian. Maka, bagi mengatasi masalah, Dewan ini hendaklah mengambil ketetapan bahawa, pihak Kementerian hendaklah memasang "Standby Generator Set" bagi Klinik Kesihatan Putatan."

[Kementerian Kesihatan]

15. PR-1323-U63531

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, gangguan bekalan elektrik di negeri Sabah kian menjadi-jadi di mana dikatakan daripada tahap teruk kepada tahap parah". Dan mengambil maklum juga, bahawa setiap kali gangguan bekalan elektrik berlaku, terdapat banyak rungutan dari kalangan rakyat mengenai dengan kerugian daripada segi produktiviti, hasil dan juga kerosakan harta benda. Dan mengambil maklum juga bahawa setiap gangguan bekalan elektrik berlaku, wakil rakyat akan diburu dan dipersalahkan.

Dan mengambil maklum juga bahawa, kenyataan demi kenyataan oleh pihak berwajib bahawa gangguan bekalan elektrik di negeri Sabah akan dapat diatasi tetapi sehingga kini gangguan bekalan elektrik tetap berlaku malah semakin kerap. Maka, demi untuk kesejahteraan rakyat, Dewan ini hendaklah mengambil ketetapan bahawa, pihak Kementerian mengambil satu tindakan yang drastik jangka pendek dan jangka panjang bagi mengatasi masalah gangguan bekalan elektrik di negeri Sabah. "

[Kementerian Tenaga, Teknologi Hijau dan Air]

16. PR-1323-U63540

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, sejak akhir-akhir ini, terdapat banyak seruan untuk membawa negeri Sabah dan Sarawak keluar daripada Persekutuan Malaysia. Dan mengambil maklum juga, bahawa seruan ini adalah kononya berikutan dengan ketidakpuasan hati segelintir rakyat di kedua-dua negeri ini mengenai dengan isu-isu seperti royalti minyak, tarikh kemerdekaan, pengagihan dana pembangunan serta status ekonomi Bumiputera Negeri Sabah dan Sarawak. Dan mengambil maklum juga bahawa, dalam kes negeri Sabah, Isu Pembentangan Laporan Suruhanjaya Siasatan Diraja mengenai pendatang asing tanpa izin yang dikatakan dilengah-lengahkan serta kebanjiran pendatang asing tanpa izin ke negeri Sabah yang dikatakan telah menggugat keselamatan negara, telah memburukkan lagi keadaan. Dan juga mengambil maklum bahawa, sentimen Anti-Persekutuan dan sentimen Anti Sabah dan Sarawak yang dimainkan oleh segelintir pihak kini kian merebak dengan serius dan, ini kalau tidak ditangani dengan kadar segera akan menyebabkan kacau bilau dan menggugat keharmonian negara. Serta mengambil maklum juga bahawa, terdapat juga kenyataan-kenyataan pemimpin Kerajaan, NGO dan orang perseorangan yang dianggap kurang sensitif kepada perasaan penduduk negeri Sabah dan Sarawak. Maka, bagi menangani masalah ini, Dewan ini hendaklah mengambil ketetapan bahawa, Kerajaan hendaklah mengambil tindakan tegas kepada mereka yang bertanggungjawab, sama ada dari pihak awam, NGO, pemimpin Kerajaan dan pembangkang agar sentimen Anti-Persekutuan serta anti Sabah dan Sarawak dapat dibendung. Kerajaan juga hendaklah bertindak untuk menutup mana-mana laman sosial yang telah dibuktikan terlibat dalam gejala ini."

[Kementerian Dalam Negeri]

17. PR-1323-U63554

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, kemalangan yang melibatkan maut terutama sekali kenderaan awam kian meningkat kerana disebabkan oleh pemanduan laju. Dan mengambil maklum juga, bahawa kadar kemalangan ini meningkat terutama sekali dalam musim perayaan di mana para pengusaha dan pemandu kenderaan pengangkutan awam cuba memaksimumkan keuntungan dengan tanpa menghiraukan keselamatan penumpang.

Dan mengambil maklum juga bahawa, pihak berkuasa seperti Suruhanjaya Pengangkutan Awam Darat, Jabatan Pengangkutan Jalan dan Polis Diraja Malaysia menghadapi kekangan kekurangan tenaga anggota serta jarak untuk menguatkuasakan had laju. Dan mengambil maklum juga bahawa, kuasa pengguna (penumpang) kenderaan pengangkutan awam boleh membantu pihak berkuasa untuk menentukan had laju kenderaan yang mereka tumpang dengan menegur pemandu tersebut apabila mereka melepasi had laju yang dibenarkan. Dan mengambil maklum juga bahawa pemasangan meter kelajuan kedua serta alat penggera di dalam kenderaan pengangkutan awam akan membolehkan para penumpang menyedari bahawa kenderaan yang mereka naiki telah melepasi had laju yang dibenarkan dan sekali gus menegur si pemandu tadi dan ini dapat mengelakkan kemalangan daripada berlaku. Maka, bagi menangani masalah kemalangan yang disebabkan oleh pemanduan laju, dewan ini hendaklah mengambil ketetapan bahawa, semua kenderaan pengangkutan awam hendaklah dipasang dengan meter kelajuan kedua dan alat penggera. "

[Perdana Menteri]

18. PR-1323-U63967

Tuan M. Kulasegaran [Ipoh Barat] akan mencadangkan:-

"Bahawa Dewan ini mengambil maklum bahawa Kerajaan telah gagal untuk perhatin terhadap situasi pemerdagangan manusia dan mengambil tindakan dalam kes-kes pemerdagangan manusia sehingga Malaysia telah turun gred sehingga ke Tahap 3 (Tier 3) seperti yang dilaporkan oleh Kerajaan Amerika Syarikat dalam Laporan Pemerdagangan Orang 2014 (Trafficking in Persons Report 2014). Dalam keadaan ini Dewan ini mengarah Perdana Menteri mengambil tindakan untuk mengatasi masalah ini dengan segera."

[Kementerian Dalam Negeri]

19. PR-1323-U64509

Dr. Tan Seng Giaw [Kepong] akan mencadangkan:-

"Bahawa Dewan ini membahaskan dasar dan langkah untuk mencegah ekstremisme di Malaysia. "

[Kementerian Dalam Negeri]

20. PR-1323-U64511

Dr. Tan Seng Giaw [Kepong] akan mencadangkan:-

"Bahawa Dewan ini membincangkan dasar perubahan iklim."

[Kementerian Sumber Asli dan Alam Sekitar]

21. PR-1323-U65224

Tuan Manivanan a/l Gowindasamy [Kapar] akan mencadangkan:-

"Bahawa Dewan ini mempertimbangkan cadangan untuk kes kematian di bawah tahanan Polis Di Raja Malaysia, keluarga si mati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan"

[Kementerian Dalam Negeri]

22. PR-1323-U65226

Tuan Manivanan a/l Gowindasamy [Kapar] akan mencadangkan:-

"Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia."

[Kementerian Pendidikan]

RISALAT-RISALAT YANG DIBAWA KE DALAM MESYUARAT
(DEWAN RAKYAT)

<u>TAHUN</u> <u>2014</u>	<u>RISALAT/DOKUMEN</u>	<u>TARIKH</u> <u>DIBENTANGKAN</u>
DR.5	Laporan Jawatankuasa Kira-Kira Wang Negara Parlimen Ketiga Belas – Pengurusan Perolehan Kapal Penyelidikan & Latihan RV Discovery Oleh Universiti Malaysia Terengganu (Kementerian Pendidikan)	27 Oktober 2014